

**Broj: X-K/08/596-3****Sarajevo, 20.01.2010 godine****U I M E B O S N E I H E R C E G O V I N E**

Sud Bosne i Hercegovine, u vijeću sastavljenom od sudije Ize Tankića, kao predsjednika vijeća, te sudija Nenada Šelede i Branka Perića, kao članova vijeća, uz sudjelovanje pravnog saradnika Mirele Gadžo, kao zapisničara, u krivičnom predmetu protiv optuženog Agana Kadušića i dr., zbog krivičnog djela Organizirani kriminal iz člana 250. stav 1., u vezi sa krivičnim djelom Krijumčarenje osoba iz člana 189. stav 1, a sve u vezi sa članom 29. Krivičnog zakona Bosne i Hercegovine (KZ BiH), povodom optužnice Tužilaštva Bosne i Hercegovine, broj: KT-509/08 od 25.06.2009 godine, potvrđena dana 09.07.2009. godine, nakon održanog ročišta za izricanje krivično pravne sankcije na osnovu sporazuma o priznanju krivnje zaključenog dana 08.01.2010 godine između Tužilaštva BiH i optuženog Agana Kadušića, u prisustvu tužioca Tužilaštva BiH Jasmine Gafić, optuženog i njegovog branioca Mithata Koče, donio je i javno objavio dana 20.01.2010 godine sljedeću:

P R E S U D U

AGAN KADUŠIĆ, sin Huseina i majke Zlate rod. Zloić, rođen 05.08.1960. godine u Novom Gradu, nastanjen u ulici ..., završena SSS, zaposlen, oženjen, otac dvoje djece, po nacionalnosti ..., državljanin ..., JMBG: ..., osuđivan, drugi krivični postupci u toku, nalazi se u pritvoru od 01.04.2009 godine po rješenju Suda BiH broj: ... odgodine.

K R I V J E**Što je:**

U periodu od kraja 2008. godine, pa do marta 2009.godine, radi sticanja finansijske koristi, zajedničkim djelovanjem sa njemu poznatim osobama, međusobno dogovorenim i povezanim radnjama, organizovano se bavio nedozvoljenim prebacivanjem - krijumčarenjem drugih osoba, uglavnom turskih državljana preko teritorija Makedonije, Srbije, BiH, R.Hrvatske i R.Slovenije, a zatim u zemlje Zapadne Evrope, u suprotnosti sa članom 8. Zakona o nadzoru i kontroli prelaska državne granice, te članom 10. i 54. Zakona o kretanju i boravku stranaca i azilu i protivno Konvenciji UN protiv transnacionalnog organizovanog kriminala i protivno Protokolu protiv krujumčarenja migranata kopnom, morem, zrakom i za prevenciju i kažnjavanje trafikinga osoba, naročito žena i djece, zbog čega je vršio niz pripremnih radnji u organiziranom krijumčarenju ilegalnih imigranata, njihovog transporta u BiH, ugovaranja primopredaje radi organiziranog ilegalnog prebacivanja u R.Sloveniju i dalje, a u što su uključene, na različite načine, više osoba, koje su učestvovala u izdavanju garantnih i poslovnih pozivnih pisama, prihvatu i prevozu osoba, smještaju, pripremanju potrebne dokumentacije, ulaznih viza za Srbiju, nakon čega su organizirali slijedeće prevoze i primopredaju osoba na teritoriju BiH i R.Hrvatske prema izvršenim kontrolama i dokazima;

Agan Kadušić, zajedno sa Abedinom Vesnićem i izvjesnim Ismailom Uysal zv. „Metin“:

1) Dana 23.01.2009. godine, Agan Kadušić je kao pripadnik međunarodne kriminalne organizacije, koja se bavi krijumčarenjem osoba, sudjelovao u prebacivanju dvojice turskih državljana: Musluma Atmace i Kadira Kilica iz Turske u zemlje EU, na taj način, što je po uputama organizatora iz Turske i izvjesnog «Arapa», koji se prethodno dogovorio sa ovim licima - ilegalnim imigrantima da im ovaj organizuje prebacivanje do Italije za iznos od 4.000 EUR-a, od čega su ovi kao akontaciju odmah isplatili 1.000 EUR-a, a 3.000 EUR-a kada dođu u Zagreb i koji su dana 21.01.2009.godine krenuli iz Istanbula do Tirane, a sve prema uputama izvjesnog „Arapa“, koji im je rekao da će ih u Tirani neko sačekati. U Tirani ih je sačekao nepoznati muškarac koji ih je smjestio u hotel «Alphin» u Tirani, nakon čega ih je odmah zvao «Arap» i pitao da li su se smjestili, a zatim im dao upute kako i kuda dalje da nastave put. Narednog dana nastavljaju put prema Skadru, a zatim prema Podgorici u Crnoj Gori, sve po uputama «Arapa». Kada su došli u Podgoricu, smjestili su se u hotel «Evropa», a onda ih je opet nazvao «Arap» i rekao im da narednog dana krenu autobusom za mjesto Rožaje, gdje će ih čekati jedan čovjek sjede kose, koji je njegov prijatelj. Nakon što su prenoćili jednu noć u Podgorici, nastavili su put prema Rožaju autobusom, kako ih je «Arap» uputio, a po dolasku u Rožaje, na autobusnoj stanici dočekuje ih muškarac koji im se predstavlja kao «Agan». Ta osoba ih je potom smjestila u svoje vozilo marke „Ford-Focus“, metalik sive boje, BH reg. oznaka 986-T-137, te su krenuli u BiH. Po dolasku na granični prijelaz „Metaljka“, imigranti su dali svoje pasoše «Aganu», koji je izašao iz vozila i odnio pasoše u policijski kontejner, gdje se zadržao oko 10 minuta, nakon čega se vratio sa pasošima u kojima su bili utisnuti ulazni pečati «MGP Metaljka». Po dolasku u Sarajevo, «Agan» ih je odveo u svoj stan u ul. Behdžeta Mutevelića br. 5. Kada su ušli u «Aganov» stan, «Agana» je nazvao «Arap» na telefon i tražio da razgovara sa Muslumom. Tom prilikom, «Arap» je Muslumu rekao, da njih dvojica daju «Aganu» iznos od 440 EUR-a za njegove usluge. Dok su boravili u Aganovom stanu, on im je izvadio tranzitne vize za Srbiju, za koje su Muslum i Kadir mislili da su Hrvatske, jer će putovati preko Hrvatske, te im kupio vozne karte za Zagreb. Za spomenute vize, Muslum i Kadir su platili Aganu 100 EUR-a. Nakon dva dana boravka u Aganovom stanu, on ih prebacuje u hotel «Orijent», gdje također borave dva dana, a onda se dana 28.1.2009. upućuju vozom za Zagreb, gdje ih je trebao prihvatiti Ismail Uysal zv. „Metin“. Dolaskom na granicu BIH i Hrvatske, policajci MUP-a RH im odbijaju ulazak i oni se ponovo vozom vraćaju u Sarajevo. Kada su došli u Sarajevo, ponovo ih kontaktira «Arap» i upućuje ih da se smjeste u pansion tj. privatnu kuću u Humskoj br. 21, a također im govori da sutradan dođu na željezničku stanicu, gdje će ih čekati dvojica ljudi, koji će ih ilegalno prebaciti u Hrvatsku. Kada su se smjestili u pansion u ulici Humskoj na broju 21, tu su se susreli i sa Hasanom Taze. Narednog dana sva trojica: Muslum Atmaca, Kadir Kilic i Hasan Taze odlaze na željezničku stanicu i tada Musluma naziva osoba koja se predstavlja kao «Metin» i govori mu da je on „Arap“-ov prijatelj, te da će se on pobrinuti oko njihovog daljeg prebacivanja, kao i da neko vrijeme sačekaju na stanici, dok im se on ponovo ne javi. Nakon pet sati čekanja, «Metin» ih ponovo kontaktira i govori im da izađu ispred stanice. Postupajući po Metinovim uputama oni izlaze iz stanice, gdje ih sačekuje njima nepoznati muškarac - Abedin Vesnić, koji ih poziva u svoje vozilo marke Škoda Octavia, karavan, bijele boje, reg.oznaka 571-E-824, te ih odvozi u hotel «Orijent» u Sarajevu. Nakon dolaska u hotel «Orijent», ponovo ih kontaktiraju i «Metin» i «Arap» i govore im da tu prespavaju, jer tog dana ne mogu nastaviti dalje. Sutradan ujutro, Musluma Atmacu ponovo naziva «Arap» i govori mu da svi izađu ispred hotela, gdje će ih čekati dva čovjeka. Kada su oni izašli, sačekala su ih dva čovjeka koja su im se predstavila kao «Ahmet» i «Mehmet» i koji su ih potom odvezli sa PMV-om marke Opel-Astra,

karavan, bijele boje, srbijanskih oznaka UE-986-24 i smjestili u jedan stan u Sarajevu, na adresi Trg Zlatnih ljiljana br. 22. Narednog dana, 01.02.2009.godine oko 14,00 sati «Ahmet» - Vesnić Ahmed i NN lice «Mehmet» ih izvode iz stana i predaju osobi koja im se predstavlja kao «Goran» i koji ih potom sa svojim vozilom marke Mercedes 190, plave boje, BH reg. oznaka 344-J-390, prevozi do granice. Dok su putovali sa Goranom do granice, čitavo vrijeme su ih pratili «Ahmet» i «Mehmet» u bijeloj Opel-Astri. Kada su došli blizu granice, Muslum Atmaca, Kadir Kilic i Hasan Taze su izašli iz Goranovog vozila, a preuzeo ih je «Mehmet», koji ih je potom pješice proveo kroz šumu na teritoriju Hrvatske i odmah se vratio nazad. U međuvremenu je «Goran» sa svojim vozilom prešao granicu na graničnom prijelazu i sačekao ih s druge strane, kojom prilikom sva trojica ponovo sjedaju u Goranovo vozilo i nastavljaju putovanje kroz Hrvatsku. Nakon izvjesnog vremena, «Goran» se zaustavlja u Metkoviću radi predaje turskih državljana NN osobi koja ih je trebala dalje prabaciti do Zagreba i predati «Metinu», ali ih u tom trenutku zaustavlja policija RH i lišava slobode.

Agan Kadušić, zajedno sa Fuadom Dizdarevićem

2) Dana 15/16.02.2009.godine, Agan Kadušić, kao pripadnik međunarodne kriminalne organizacije koja se bavi krijumčarenjem osoba, radi sticanja finansijske koristi, organizovao i lično sudjelovao u prebacivanju turskih državljana Ismeta Hanoe i Turguta Kayae, preko teritorije BiH, na taj način što je po uputama organizatora iz Turske i Ismaila Uysala zv. „Metin“, koji su ilegalnim imigrantima prethodno obećali organizovati ilegalni odlazak u Francusku za iznos od 6.000 EUR-a po osobi, kada su dio novca unaprijed i naplatili, Kadušić sačekao na teritoriji BiH ovu dvojicu turskih imigranata, tako što su oni prethodno iz Istanbula, nakon što su više puta odbijeni na aerodromima na prostorima „ex-Jugoslavije“, avionom došli u Tiranu, taksijem se prebacili do Ulcinja u Crnoj Gori, gdje ih preuzima osoba pod imenom „Bekir“ i predaje fiktivna garantna pisma nepostojeće firme „ER-BU“, a zatim ilegalno prešli granicu između Crne Gore i BiH, pješice kroz šumu uz pratnju NN vodiča iz Crne Gore, Kadušić preuzeo ove imigrante, te ih potom dovezao u Sarajevo sa p.m.v. marke „Audi“ bijele boje, USA reg.oznaka 34 T 51 i iste smjestio u motel „Jasmin“ gdje su prespavali jednu noć, a onda narednog dana 17.02.2009.godine u cilju njihovog daljeg prebacivanja u R.Hrvatsku, angažovao osobu Fuada Dizdarevića, koji je ove turske državljanke dovezao do granice BiH i RH u blizini graničnog prijelaza „Unka“ na području općine Čapljina, kada ih Agan Kadušić i Fuad Dizdarević zajedno prevode preko granice između BiH i R.Hrvatske, kroz šumu, nakon čega se Agan Kadušić vraća u BiH, pošto je od ovih ilegalnih imigranata naplatio iznos od 800 EUR-a, a Fuad Dizdarević po uputama Kadušića kreće dalje s turskim državljanima, s ciljem njihovog upućivanja u Zagreb, autobusnom linijom, gdje ih je trebao prihvatiti Ismail Uysal zv. „Metin“, koji je trebao dalje realizirati njihovo prebacivanje u zemlje EU.

Agan Kadušić, sam

3) Dana 07.10.2008.godine u 23,25 sati u istoj namjeri kao pod tačkom 1) Kadušić Agan ušao u BiH na GP „Klobuk“ sa PMV-om marke „Ford-Fiesta“, reg. oznaka 010-A-075, kojom prilikom su sa njim u vozilu bili turski državljani Yasar Bekir, Yildiz Teysir i Mustafa Kanberoglu, nakon čega se ovim turskim državljanima gubi svaki trag. (Ne postoje podaci o izlasku ovih osoba iz BiH, što ukazuje na vjerovatnoću da su ilegalno izašli iz BiH u RH),

4) Dana 13.10.2008.godine u istoj namjeri kao pod tačkom 1) Kadušić Agan ušao u BiH na graničnom prijelazu „Klobuk“ u 19,00 sati, sa PMV-om marke „Ford-Fiesta“ reg. oznaka 010-A-075, kojom prilikom su sa njim u vozilu bili turski dravljeni: Karciga Mehmetgani, Zahir Demirhan i Tartan Feyzah, nakon čega se ovim turskim državljanima gubi svaki trag. (Ova grupa turskih državljana je izašla iz BiH dana 15.10.2009.g. na željezničkom graničnom prijelazu Dobrljin),

5) Dana 24.10.2008.godine u istoj namjeri kao pod tačkom 1) Kadušić Agan ušao u BiH na graničnom prijelazu „Klobuk“ u 20,30 sati, sa PMV-om marke „Ford-Fiesta“ reg. oznaka 010-A-075, kojom prilikom su sa njim u vozilu bili turski dravljeni: Tastan Engin i Tastan Kazim, nakon čega se ovim turskim državljanima gubi svaki trag. (Ne postoje podaci o izlasku ovih osoba iz BiH, što ukazuje na vjerovatnoću da su ilegalno izašli iz BiH u RH, te otišli u zemlje EU).

6) Dana 03.02.2009.godine u istoj namjeri kao pod tačkom 1) Kadušić Agan ušao u BiH na graničnom prijelazu „Klobuk“ u 14,30 sati, sa PMV-om marke „Ford-Focus“ reg. oznaka 986-T-137, kojom prilikom su sa njim u vozilu bili turski dravljeni: Dogan Ahmet i Yalcin Fikret, nakon čega se ovim turskim državljanima gubi svaki trag.

7) Dana 13.02.2009.godine u istoj namjeri kao pod tačkom 1) Kadušić Agan ušao u BiH na graničnom prijelazu „Metaljka“ u 17,55 sati, sa PMV-om marke „Ford“ reg. oznaka 081-M-530, kojom prilikom je sa njim u vozilu bio turski državljanin Yildirim Osman, nakon čega se ovom turskom državljaninu gubi svaki trag. (Ne postoje podaci o izlasku ovih osoba iz BiH, što ukazuje na vjerovatnoću da je ilegalno izašao iz BiH u RH, te otišao u zemlje EU).

8) Dana 08.03.2009. godine, kao pripadnik međunarodne kriminalne organizacije, koja se bavi krijumčarenjem osoba, radi sticanja financijske koristi, sudjelovao u prebacivanju turskih državljana Arslana Ozkana i Nizamtteina Gula iz Turske u zemlje EU, na taj način, što je po uputama organizatora iz Turske i Ismaila Uysala «Metina» iz Zagreba, sačekao na teritoriju BiH dvojicu navedenih turskih državljana, nakon što su oni prethodno ilegalno ušli u BiH iz Crne Gore kroz šumu uz pratnju NN vodiča iz Crne Gore, kojemu je Agan Kadušić prilikom preuzimanja turskih državljana isplatio iznos od 200 EUR-a za njegove usluge, a nakon toga ih on dovezao u Sarajevo sa PMV-om marke «Comodore», reg. oznaka 803-M-568 i iste smjestio u svoj stan koji se nalazi u ulici Behdžeta Mutevelića broj 5, gdje oni borave jedan dan, da bi ih narednog dana prebacio i smjestio u hotel „Jasmin“ u Sarajevu, sve u cilju omogućavanja njihovog daljeg transporta za Hrvatsku, gdje ih je trebao prihvatiti Ismail Uysal, iz čega proizilazi da je Agan Kadušić kao član međunarodne kriminalne organizacije, obavljajući svoj dio posla koji mu je organizacijski dodijeljen, dao svoj doprinos organiziranom prebacivanju ilegalnih imiganata na cjelokupnoj ruti njihovog putovanja od Turske ka zemljama Zapadne Europe. Za usluge prebacivanja od granice do Sarajeva i smještaja u njegovom stanu, turski državljeni su Aganu Kadušiću isplatili iznos od 650 EUR-a.

9) Dana 07.03.2009.godine na graničnom prijelazu između Crne Gore i BiH „Klobuk“, Agan Kadušić kao pripadnik međunarodne kriminalne organizacije, koja se bavi krijumčarenjem osoba, radi sticanja financijske koristi, kontinuirano sudjeluje u organizaciji prebacivanja ilegalnih imigranata iz Turske u zemlje EU, pa je tako navedenog dana oko 07,45 sati izašao iz BiH na graničnom prelazu „Hum“ kojom prilikom je sa njim u vozilu bila samo Jasmina Pohara rođena 05.03.1969.godine u Foči, posjeduje osobnu kartu BiH broj:..., kao i da je istog dana oko 13,30 sati ušao u BiH iz Crne Gore na graničnom prelazu

„Klobuk“ sa pmv-om marke „Ford Fokus“, reg. oznaka 081-M-830, a kojom prilikom su sa njim u vozilu pored navedene, bila još i dva turska državljana i to: Demir Nudžulan rođen 16.03.1989.godine, posjeduje putnu ispravu Turske broj: ... i Muslum Polat rođen 30.03.1974.godine, posjeduje putnu ispravu Turske broj: ..., nakon čega se ovim licima gubi svaki trag.

10) U periodu od 01.02.2009. godine do 11.02.2009. godine radi sticanja izravne finansijske koristi, kao pripadnik međunarodne kriminalne organizacije lično sudjelovao u ilegalnom prevođenju – krijumčarenju turskog državljanina Mustafe Cana iz Republike Turske u zemlje Europske Unije, tako što je prema uputama primljenim od Ismaila Uysala zvanog „Metin“ iz Zagreba, organizirao prihvrat pomenutog turskog državljanina u Bosnu i Hercegovinu, te dana 06.02.2009. godine njegovo daljnje sprovođenje u Mostar, nakon čega je Mustafa Can ilegalno prešao u Republiku Hrvatsku te dana 11.02.2009. godine putem Western Uniona-a, sa uplatnog mjesta iz Republike Hrvatske poslao Aganu Kadušiću iznos od 100 EUR-a za njegove usluge.

Dakle, Agan Kadušić pod tačkom 1, 2, 3, 4, 5, 6, 7, 8, 9, i 10, u svrhu sticanja protupravne imovinske koristi, kao pripadnik zločinačke organizacije učinio krivična djela propisana Zakonom BiH, gdje za pojedino krivično djelo nije propisana teža kazna, prevodeći iz koristoljublja preko državne granice lica koja ne ispunjavaju uslove za zakoniti ulazak preko državne granice, odnosno omogućio drugima nedozvoljeni prelazak preko državne granice,

Čime je:

pod tačkom 1, 2, 3, 4, 5, 6, 7, 8, 9, i 10 počinio krivično djelo Organizirani kriminal iz člana 250. stav 1. KZ-a BiH, a u vezi sa krivičnim djelom Krijumčarenje osoba iz člana 189. stav 1. KZ-a BiH, a sve u vezi sa članom 29. KZ BiH.

Pa **optuženog Agana Kadušića**, Sud na osnovu primjene navedenih zakonskih propisa i uz primjenu odredaba iz članova 39, 42. i 48. Krivičnog zakona Bosne i Hercegovine

OSUĐUJE

NA KAZNU ZATVORA U TRAJANJU OD 3 (TRI) GODINE

Na osnovu primjene zakonskog propisa iz člana 56. KZ BiH, optuženom Aganu Kadušiću u izrečenu kaznu zatvora uračunava se vrijeme provedeno u pritvoru od 01.04.2009 godine godine do 20.01.2010 godine.

Na osnovu člana 74. KZ BiH, optuženom Aganu Kadušiću se oduzimaju predmeti naznačeni u potvrdama o privremenom oduzimanju predmeta, broj: 18-08-2-04-11/09, 18-08-2-04-12/09 i 18-08-2-04-13/09, od 01.04.2009 godine, i to: dva mobilna telefona, četiri SIM kartice, uplatnica Western Union-a, račun „Kornat“ d.o.o. Rent-a car, dva ugovora o najmu vozila „Ford Focus“ (registarskih oznaka: 986-T-137 i 968-T-189), uplatnice i uplatni nalog, pozivno pismo Agana Kadušića za Muslum Polatu i Nurlah Demira i dvije tablice USA registarskih oznaka 225 i 1313, a koji su upotrijebljeni prilikom učinjenja krivičnog djela.

U skladu sa odredbom člana 188. stav 1. ZKP BiH, optuženi Agan Kadušić se obavezuje da naknadi troškove krivičnog postupka, čiju visinu će odrediti Sud posebnim rješenjem.

O b r a z l o ž e n j e

Tužilaštvo Bosne i Hercegovine je optužnicom broj: KT-509/08 od 25.06.2009 godine, potvrđenom dana 09.07.2009 godine, optužilo Agana Kadušića i Zorana Bašića, za krivično djelo Organizirani kriminal iz člana 250. stav 1. KZ-a BiH, a u vezi sa krivičnim djelom Krijumčarenje osoba iz člana 189. stav 1. KZ-a BiH, a sve u vezi sa članom 29. KZ BiH.

Optuženi Agan Kadušić je dana 08.01.2010 godine zaključio sporazum o priznanju krivnje sa Tužilaštvom BiH, koji je dostavljen Sudu dana 08.01.2010 godine na razmatranje.

Obzirom na zaključeni sporazum o priznanju krivnje, na glavnom pretresu, održanom dana 20.01.2010 godine, Sud je na osnovu člana 26. ZKP BiH donio rješenje kojim je krivični postupak razdvojio u odnosu na optuženog Agana Kadušića i odredio da se postupak u odnosu na istog ima dovršiti pred Sudom pod brojem: X-K-08/596-3, nakon čega se nastavilo sa ročištem za razmatranje sporazuma o priznanju krivnje.

Sud je, u skladu sa članom 231. ZKP BiH, razmotrio zaključeni sporazum o priznanju krivnje, kojim je optuženi priznao krivnju za počinjena krivična djela Organiziranog kriminala iz člana 250. stav 1., u vezi sa krivičnim djelom Krijumčarenje osoba iz člana 189. stav 1., a sve u vezi sa članom 29 KZ BiH, a koja djela mu se optužnicom stavljaju na teret.

U sporazumu je predloženo da se istom za počinjeno krivično djelo izrekne безусловna kazna zatvora u trajanju od 2 (dvije) godine i 6 (šest) mjeseci do 3 (tri) godine.

Optuženi Agan Kadušić se obavezao da nadoknadi troškove koji su proizašli iz ovog krivičnog postupka, u iznosu koji utvrdi Sud.

Na održanom pretresu za razmatranje sporazuma o priznanju krivnje, Sud je utvrdio da je optuženi sklopio navedeni sporazum dobrovoljno, svjesno i sa razumijevanjem, a nakon što je upoznat sa mogućim posljedicama, uključujući i posljedice vezane za moguće imovinsko pravne zahtjeve i troškove krivičnog postupka.

Sud je također utvrdio i da postoji dovoljno dokaza o krivnji optuženog, kao i da je optuženi razumio da se na ovaj način odriče prava na suđenje i da ne može izjaviti žalbu na krivičnopravnu sankciju koja će mu biti izrečena.

Tužilaštvo je na glavnom pretresu i ročištu za ocjenu sporazuma o priznanju krivnje, izvelo dokaze, i to saslušanje svjedoka Vesne Softić, Amele Vuković, Elvedina Jusića, Almedina Omerbegovića, Ranka Čečara, Brigitte Zajec, Jasmine Pohara, Mithata Tihića, Muamera Fazlagića, Edvina Kutlovca, Amre Aljić, Stjepana Bevande i Eldina Smajlagića, zatim je izvršen uvid u materijalne dokaze, i to: Zapisnik o saslušanju svjedokinje Brigitte Zajec, broj: 18-08-02-04-51/09 od 22.04.2009. godine, Zapisnik o saslušanju svjedoka Ranka Čečara, broj: 18-08-02-04-52/09 od 22.04.2009. godine, Zapisnik o saslušanju svjedokinje Vesne Softić, broj: 18-08-02-04-63/09 od 01.06.2009. godine, Zapisnik o saslušanju svjedoka Elvedina Jusića, broj: 18-08-02-53/09 od 24.04.2009. godine, Zapisnik o

saslušanju svjedoka Amele Vuković, broj: 18-08-02-04-54/09 od 24.04.2009. godine, Zapisnik o saslušanju svjedoka Almedina Omerbegovića, broj: 18-08-2-04-754-55/09 od 27.04.2009. godine, Zapisnik o saslušanju svjedoka Gorana Gašića, broj: 18-08-02-04-50/09 od 14.04.2009. godine, Zapisnik o saslušanju svjedoka Hasana Taze, broj: 18-08-02-04-04/09 od 05.02.2009. godine, Zapisnik o saslušanju svjedoka Kadira Kilic, broj: 18-08-02-04-03/09 od 04.02.2009. godine, Zapisnik o saslušanju svjedoka Musluma Atmaca, broj: 18-08-02-04-02/09 od 04.02.2009. godine, Zapisnik o saslušanju svjedoka Ismeta Hano, broj: 18-08-02-04-06/09 od 20.02.2009. godine, Zapisnik o saslušanju svjedoka Turgut Kaya, broj: 18-08-02-04-05/09 od 20.02.2009. godine, Zapisnik o saslušanju svjedoka Demira Musluma, broj: 18-08-02-04-01/09 od 20.01.2009. godine, Zapisnik o saslušanju svjedoka Arslana Ozkana, broj: 18-08-02-04-25/09 od 19.03.2009. godine, Zapisnik o saslušanju svjedoka Nizamettina Gula, broj: 18-08-02-04-24/09 od 19.03.2009. godine, Zapisnik o saslušanju svjedokinje Jasmine Pohara, broj: 18-08-02-04-47/09 od 09.04.2009. godine, Ovjerena dokumentacija uz iskaz svjedoka Elvedina Jusića (ulaz-izlaz, Rješenje o odbijanju ulaska; fotokopija P.I.), Ovjerena dokumentacija uz iskaz svjedoka Almedina Omerbegovića (ulaz-izlaz, Rješenje o odbijanju ulaska; fotokopija P.I.), Ovjerena dokumentacija uz iskaz svjedokinje Amele Vuković (ulaz-izlaz, Rješenje o odbijanju ulaska; fotokopija P.I.), Foto album – prilog izjavi svjedoka Gorana Gašića broj: 18-08-2-04-50/09 od 14.04.2009. godine, Foto album broj 2 – prilog Zapisniku o prepoznavanju osoba po izjavi svjedoka Hasana Taze od 05.02.2009. godine, Foto album broj 3 – prilog Zapisniku o prepoznavanju po izjavi svjedoka Kadir Kilic od 05.02.2009. godine, Foto album broj 1 – prilog Zapisniku o prepoznavanju po izjavi svjedoka Musluma Atmaca od 05.02.2009. godine, Foto album – prilog Zapisniku o prepoznavanju po izjavi svjedoka Ismeta Hano, broj: 18-08-2-KU-05-FA-1/09 od 19.02.2009. godine, Fotodokumentacija – prilog izvršenom prepoznavanju osoba Ismeta Hano, broj: 18-08-2-KU-05-FD1/09 od 20.02.2009. godine, Foto album– prilog Zapisniku o prepoznavanju po izjavi svjedoka Trugut Kaya, broj: 18-08-2-KU-05-FA-2/09 od 19.02.2009. godine, Fotodokumentacija – prilog izvršenom prepoznavanju osoba od strane Turgut Kaya, broj: 18-08-2-KU-05-FD2/09 od 20.02.2009. godine, Foto album - prilog Zapisnika o saslušanju svjedoka Demira Musluma, broj: 18-08-2-KU-02-FA-1/09 od 22.01.2009. godine, Foto album - prilog Zapisnika o prepoznavanju osoba, broj: 18-08-2-KU-02-FA-2/09 od 22.01.2009. godine, Fotodokumentacija - istražna radnja prepoznavanja osobe pomoću fotografija Demira Musluma, broj: 18-08-2-KU-02-FD-1/09 od 22.01.2009. godine, Foto-dokumentacija kao prilog Zapisniku o prepoznavanju po izjavi svjedoka Arslana Ozkana, broj: 18-08-2-KU-06-FA1/09 od 20.03.2009. godine, Foto-dokumentacija kao prilog Zapisniku o izvršenom prepoznavanju osobe od strane Arslana Ozkana, broj: 18-08-2-KU-06-FD2/09 od 20.03.2009. godine, Foto-dokumentacija kao prilog Zapisniku o prepoznavanju po izjavi svjedoka Nizamettina Gula, broj: 18-08-2-KU-06-FA2/09 od 20.03.2009. godine, Foto-dokumentacija kao prilog Zapisniku o izvršenom prepoznavanju osoba od strane Nizamettina Gula, broj: 18-08-2-KU-06-FD1/09 od 20.03.2009. godine, Najavu prihvata osoba MUP-a Republike Hrvatske u skladu sa Sporazumom između Vlade Republike Hrvatske i Vijeća Ministara BiH o suradnji u predaji i prihvatu osoba kojih je boravak protuzakonit, broj: 511-03-12-P-3-22/09 od 01.02.2009. godine, Zapisnik o primopredaji MUP-a Republike Hrvatske, broj: 511-03-12-P-3/22/09 od 02.02.2009. godine, Rješenje Ministarstva sigurnosti BiH o protjerivanju Taze Hasana sa teritorija BiH, broj: UP-1-19.4.16-07.3-03/09 od 02.02.2009. godine, Rješenje Ministarstva sigurnosti BiH o stavljanju pod nadzor Taze Hasana, broj: UP-1-19.4.16-07.3-03/1 od 02.02.2009. godine, Rješenje Ministarstva sigurnosti BiH o protjerivanju Atmaca Musluma sa teritorija BiH, broj: UP-1-19.4.16-07.3-04/09 od 02.02.2009. godine, Rješenje Ministarstva sigurnosti BiH o stavljanju pod nadzor Atmaca Muslum, broj: UP-1-19.4.16-07.3-04/1 od

02.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-6 od 05.02.2009. godine, Zapisnik Granične policije BiH o prepoznavanju osoba, broj: 18-08-2-04-754-3 od 05.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-5 od 05.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-9 od 05.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-10 od 05.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-11 od 05.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-16 od 05.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-17 od 05.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-18 od 05.02.2009. godine, Izvod iz baze podataka prelazaka državne granice za dan 23.01.2009. godine, Službenu zabilješku Granične policije BiH, broj: 18-08-2-08/09 od 17.02.2009. godine, Izvod iz knjige gostiju Motela „Orijent“ od 29. i 30.01.2009. godine, Službenu zabilješku Granične policije BiH, broj: 18-08-4-13/09 od 04.02.2009. godine, Službenu zabilješku Granične policije BiH, broj: 18/08-5-04-68/3-1 od 31.01.2009. godine, Ugovor o najmu pmv-a „Ford focus“ registarskih oznaka 986-T-137, Rent-a-car „Kornat d.o.o.“, broj: 975 od 25.12.2008. godine, Ugovor o najmu pmv-a „Ford focus“ registarskih oznaka 827-T-046, Rent-a-car „Kornat d.o.o.“, broj: 02/09 od 02.01.2009. godine, Ugovor o najmu pmv-a „Ford focus“ registarskih oznaka 986-T-189, Rent-a-car „Kornat d.o.o.“, broj - od 31.01.2009. godine, Ugovor o najmu pmv-a „Ford focus“ registarskih oznaka 986-T-137, Rent-a-car „Kornat d.o.o.“, broj: 266 od 09.01.2009. godine, Ugovor o najmu pmv-a „Ford fiesta“ registarskih oznaka 327-M-417, Rent-a-car „Titanic d.o.o.“, broj: 08-430 od 31.08.2008. godine, Ugovor o najmu pmv-a „Ford fiesta“ registarskih oznaka 687-J-542, Rent-a-car „Titanic d.o.o.“, broj: 08-413 od 11.08.2008. godine, Najavu prihvata prihvaća osoba MUP-a Republike Hrvatske u skladu sa Sporazumom između Vlade Republike Hrvatske i Vijeća Ministara BiH o suradnji u predaji i prihvatu osoba kojih je boravak protuzakonit, broj: 511-03-12-P-3-40 i 41/09 od 18.02.2009. godine, Rješenje Ministarstva sigurnosti BiH o protjerivanju Turguta Kaya sa teritorija BiH, broj: UP-1-19.4.3-07.3.3-12/09 od 18.02.2009. godine, Rješenje Ministarstva sigurnosti BiH o stavljanju pod nadzor Turguta Kaya, broj: UP-1-19.4.3-07.3.3-14/09 od 18.02.2009. godine, Rješenje Ministarstva sigurnosti BiH o protjerivanju Ismeta Hano sa teritorija BiH, broj: UP-1-19.4.3-07.3.3-13/09 od 18.02.2009. godine, Rješenje Ministarstva sigurnosti BiH o stavljanju pod nadzor Ismeta Hano, broj: UP-1-19.4.3-07.3.3-15/09 od 18.02.2009. godine, Ovjerene fotokopije putnih isprava Republike Turske na ime Ismet Hano, Zapisnik o primopredaji MUP-a Republike Hrvatske, broj: 511-03-12-P-3/40 i 41/09 od 18.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-25 od 20.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-26 od 20.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-23 od 20.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-24 od 20.02.2009. godine, Zapisnik Granične policije BiH o prepoznavanju osoba, broj: 18-08-2-04-754/09-27 od 20.03.2009. godine, Zapisnik Granične policije BiH o prepoznavanju osoba, broj: 18-08-2-04-754/09-28 od 20.03.2009. godine, Ovjerene fotokopije putnih isprava Republike Turske na ime Trugut Kaya, Zapisnik Granične policije BiH o prepoznavanju osoba, broj: 18-08-2-04-754/09-01 od 22.01.2009. godine, Zapisnik Granične policije BiH o prepoznavanju osoba, broj: 18-08-2-04-754/09-02 od 22.01.2009. godine, Potvrda o privremenom oduzimanju predmeta, Granične policije, broj: 18-08-2-04-07/09 od 18.03.2009. godine, Potvrda o privremenom oduzimanju predmeta, Granične policije, broj: 18-08-2-04-08/09 od 18.03.2009. godine, Potvrda o vraćanju privremeno oduzetih predmeta, Granične policije,

broj: 18-08-2-04-08/09 od 20.03.2009. godine, Potvrda o privremenom oduzimanju predmeta, Granične policije, broj: 18-08-2-04-9/09 od 18.03.2009. godine, Potvrda o privremenom oduzimanju predmeta, Granične policije, broj: 18-08-2-04-10/09 od 18.03.2009. godine, Potvrda o vraćanju privremeno oduzetih predmeta, Granične policije, broj: 18-08-2-04-10/09 od 20.03.2009. godine, Kopija ličnih isprava na ime Arslan Ozkan, Kopija ličnih isprava na ime Gul Nizamettin, Službena zabilješka Policijska uprava Karlovačka, br:511-05-07/1-72-UP/I-1-1/09 S.B od 14.03.2009, Rješenje Ministarstva sigurnosti – Služba za poslove sa strancima, br:UP-1/19.4.9-07.3-78/09 od 17.03.2009, Rješenje Ministarstva sigurnosti – Služba za poslove sa strancima, br:UP-1/19.4.9-07.3-79/09 od 17.03.2009, Rješenje Ministarstva sigurnosti – Služba za poslove sa strancima, br:UP-1/19.4.9-07.3-80/09 od 17.03.2009, Rješenje Ministarstva sigurnosti – Služba za poslove sa strancima, br:UP-1/19.4.9-07.3-81/09 od 17.03.2009, Izvještaj Granične policije – Uprava za operacije Sarajevo, br:18-04-2-04-46/8 od 19.03.2009, Potvrda o privremenom oduzimanju predmeta od Agana Kadušića, broj: 18-08-2-04-11/09 od 01.04.2009. godine, Potvrda o privremenom oduzimanju predmeta od Agana Kadušića, broj: 18-08-2-04-12/09 od 01.04.2009. godine, Potvrda o privremenom oduzimanju predmeta od Agana Kadušića, broj: 18-08-2-04-13/09 od 01.04.2009. godine, zajedno sa predmetimka naznačenim u potvrdama, Akt Interpola br:16-3-04-3-IP-E-PD-3473/08-7 od 15.06.2009, Izvod iz kaznene evidencije Ministarstva unutrašnjih poslova RS-a, br:02/7-5598/09 od 21.05.2009.

Cijeneći navedene dokaze pojedinačno i dovodeći ih u međusobnu vezu, te cijeneći priznanje optuženog, Sud je utvrdio da je optuženi Agan Kadušić počinio krivično djelo Organiziranog kriminala iz člana 250. stav 1., u vezi sa krivičnim djelom Krijumčarenje osoba iz člana 189. stav 1., a sve u vezi sa članom 29 KZ BiH, na način kako je to opisano u izreci presude, te je utvrdivši da su ispunjeni svi zakonski uslovi iz člana 231. stav 6. ZKP BiH, prihvatio zaključeni sporazum o priznanji krivnje i optuženog oglasio krivim.

Sud je, uz primjenu odredaba 39, 42. i 48. KZ BiH, optuženom Aganu Kadušiću izrekao kaznu zatvora, u trajanju od 3 (tri) godine.

Odluku u pogledu krivično pravne sankcije Sud je donio cijeneći da je ista srazmjerna težini počinjenih krivičnih djela i stepenu krivične odgovornosti optuženog, te cijeneći da će se na taj način ostvariti svrha krivičnopravne sankcije, koja se sastoji u generalnoj i specijalnoj prevenciji tj. preventivnom uticaju na druge da poštuju pravni sistem i ne čine krivična djela odnosno spriječavanje samog učinioca da čini krivična djela.

Pri odluci u pogledu krivično pravne sankcije, Sud je na strani optuženog kao olakšavajuće okolnosti posebno cijenio priznanje izvršenja krivičnog djela kroz sklapanje sporazuma o priznanju krivnje, njegovu saradnju sa Tužilaštvom, kao i porodičnost.

Pored navedenih olakšavajućih okolnosti, Sud je našao postojanje otežavajućih okolnosti koje se ogledaju u ranijoj osuđivanosti optuženog, te njegovoj upornosti pri vršenju predmetnih krivičnih djela.

Na osnovu člana 56. KZ BiH, optuženom Aganu Kadušiću Sud je u izrečenu kaznu zatvora uračunao vrijeme koje proveo u pritvoru od dana lišenja slobode, u periodu od 01.04.2009 godine do 20.01.2010 godine.

Imajući u vidu da je odredbom člana 74. KZ BiH propisano da će se predmeti, koji su upotrijebljeni ili su bili namijenjeni za izvršenje krivičnog djela, oduzeti kada postoje

opasnost da će biti ponovo upotrijebljeni za izvršenje krivičnog djela, to je Sud od optuženog oduzeo dva mobilna telefona, četiri SIM kartice, uplatnica Western Union-a, račun „Kornat“ d.o.o. Rent-a car, dva ugovora o najmu vozila „Ford Focus“ (registarskih oznaka: 986-T-137 i 968-T-189), uplatnice i uplatni nalog, pozivno pismo Agana Kadušića za Muslum Polatu i Nurlah Demira i dvije tablice USA registarskih oznaka 225 i 1313, koji su pobrojani u potvrdama o oduzimanju predmeta, a koji su korišteni prilikom izvršenja krivičnog djela, i za koje postoji opasnost da će u istu svrhu ponovo biti upotrijebljeni.

Obzirom da je članom 188. stav 1. ZKP BiH propisano da će sud, kada optuženog oglasi krivim, izreći presudu kojom će obavezati optuženog da nadoknadi troškove postupka, to je Sud optuženog obavezao da nadoknadi troškove krivičnog postupka, čiju će visinu Sud utvrditi naknadnim rješenjem.

ZAPISNIČAR

PREDSJEDNIK VIJEĆA
Sudija

Mirela Gadžo

Izo Tankić

POUKA O PRAVNOM LIJEKU: Protiv ove presude dozvoljena je žalba Apelacionom vijeću Suda u roku od 15 (petnaest) dana od dana prijema iste.